

民國賓川縣志稿

藝文四

民國賓川縣志稿

藝文四

西園先生墓表

賓陽有隱君子者二曰王公西園李公常在是已常在公
學究天人道參佛老間嘗假借醫術以活人西園公學本
程朱道尊孔孟惟持經術以教世其擇術雖不同然皆里
中盛德君子也常在公生當有明之季其卒也人傳其為
仙其軼事載在賓川州志者甚詳西園公之卒也人謂其
為神第以生當遼清中葉其亮節高風縣志既未及紀載
宜乎後之人客有未盡知之者此余所為深惜也今年丙
子春西園公五世孫思明既重修公墓畢一日忽持狀來

乞表其所余素慕公之為人且謬荷修纂省志之責表章
先達固余職事也况重以孝子賢孫之請求又豈容以不
文辭按狀公諱肇新字西園賓陽王氏曾祖諱官賢祖諱
侶均勵文行為鄉里所推崇考諱錫蕃舉鄉薦為名孝廉
其先世本江南人明初有隨沐國公入滇者初居鄧川某
鄉旅貿易來賓羨賓陽山水之勝遂徙而家焉公生而穎
悟過常人入塾讀書過目成誦有神童之譽未冠應鄉薦
成進士以科名顯咸寧方津津稱羨之而公則泊如也遜
清制凡賜進士及第得以知州儀先薦用公獨堅持不受

自都門遠反鄉里遂居家設壇教生徒人有勸之出仕者
公喟然嘆曰今之世何世一濁焉而已為仕則仕濁為商
則商濁朝則濁朝也市則濁市也學則濁學也舉天下事
殆無一而不濁吾欲清吾心潔吾身養吾性其將學老佛
之道耶然而老佛之道絕人倫而棄家國實吾儒之所深
斥也抑將如長沮桀溺之徒躬耕隴畝不問世事耶然存
厥世思想愛己而不愛羣自利而不利人則亦吾儒之所
深惡也宣聖言立己立人先民稱淑身淑世吾欲清吾心
潔吾身亦惟有恪遵斯旨以覺世教民為己任而已矣蓋

公自成進士即立講台教訓鄉中子弟凡遊其門者率皆
成德達材可稱文質彬彬之君子其教人先德行而後文
藝其為學窮義理而尤重經濟坐擁皋比凡三十年學者
至比之胡安定焉間嘗謂賓邑自弘治七年設治以來殆
已四百餘年於茲矣其掇巍科登高第者無慮十餘輩然
皆置身仕途浮沉宦海窮愁潦倒而不得伸其志或竟老
死他鄉埋骨於異地者亦往往有之獨公植品清峻敝屣
功名不求仕進終其身惟以教人為職志雖不得大用於
世而育人材固邦本正人心厚風俗要於國家社會為有

裨以視彼急於求用而無毫髮之建樹者則有間矣韓愈
送楊少尹序云古之所謂鄉先生歿而可祭於社者其公
之謂歟其公之謂歟公既少有大志雖株守田園而猶倦
倦不能忘情於國家晚年慨時政之日非憂外患之日迫
嘗歎歎太息鬱鬱寡懽若大有所不慊於心者綜其生活
凡數變始則隱於詩繼則以詩為濁也乃隱於書畫書畫
亦以為濁也終乃隱於佛講業之餘輒誦經而參禪焉人
方謂公清心寡慾必躋上壽而孰意昊天竟不憖遺老成
以輔導斯民至使之溺於水以死也悲夫公之溺死余嘗

求其故而不得豈其失於不慎歟抑其悟釋家因明唯識
之旨怡怡然而以死為歸歟抑將如三閭大夫憤天下之
皆濁置身於清流潔其身以死歟余惜未能起公而問之
也據父老傳言公之溺死因赴周官營訪親眷比歸戚某
送之橋上公鞠躬辭退退乃墜河中公既溺死入殮後人
猶於某姓經堂中見公誦經一卷而去由是入咸驚嘆謂
公為神矣夫為仙為神其說恆誕不經然吾於此則益信
公生而為英死而為靈其身雖歿而其精神固常存也公
以乾隆某年某月某日生以道光某年某月某日卒春秋

五十有二有男子子三曰永吉永康永盛咸豐回鑾永吉
弟兄相率避難山中為賊人所誘殺全家遇害獨永盛因
事他適幸得免今思明弟兄即永盛之後裔也公自幼富
有膽識素不信鬼神韶齡入校攻書見城之東南隅有淫
祠一日公率羣兒入祠毀其偶像囑令遠徙免為居民害
是夜神托夢城中人謂王進士逐我我不敢違請為移祠
於城外今南郭道左有小廟翼然而立即曩日移建者也
蓋公行事多奇往往類此鄉中父老類能道之余可無紀
獨紀其清風亮節之足以式於鄉先於國者以為今世之

汲汲名利者勸且又以自勗也遂書以表於其所

翰林院編修年春弟趙時□

新建忠烈坊記

民國丙子春共匪由黔竄滇境三月二十八日夜逆苗蕭
賀自鹽祥薄賓城賓之民登陴死守與賊鏖戰一晝夜於
時彈飛石裂煙燄蔽天血肉相搏殺傷大當其血戰經過
邦人士所撰忠烈碑墓記紀之綦詳可無贅惟紹曾自惟
其負疚滋多矣方事之殷也其實膺守土之責應盡守土
之義徒以防禦疎虞戰守乖方卒至寡人妻孤人子獨人

父母而城卒不保且又未能仗義以死節於我心有戚戚焉顧念賓民以數百未經戰陣之卒力抗橫行數省衆逾數萬之寇猶能殲賊魁寒賊膽挫賊鋒忠義奮發留正氣於天壤斯則足以自壯耳事聞既蒙國府主席林頌賜衛國成仁四字以彰之而賓邑播紳雲南鹽運使李公西平及其弟蒙藏委員會委員李公子厚又復慨捐鉅資函囑鄉人爲建忠烈坊表以慰幽魂而示來者吁二公愛護桑梓如視家庭其褒忠勵節扶翼世教之苦心殆將與死事諸君子共垂不朽矣是役也需款浩繁而工程亦較鉅幸

得邑紳褚君鏡清董其役張君子英監其工經之營之卒
底於成并書其名於石蓋亦不忘其瘁也時丁丑孟夏縣
長楊紹曾謹記

賓川抗禦赤匪殉難官紳兵民墓碑記

赤匪之亂國也時逾八九年蔓延十數省破壞名城蹂躪
市縣不可勝紀蓋以抗禦無方所致若皆協力以謀奮勇
以拒安有不早日殲滅者哉觀吾邑抗禦赤匪之役殉難
者固多而匪之死亡夷傷者亦復不少其明証也本年夏
四月赤匪由黔竄滇避實擊虛狼奔豕突於十九日經祥

雲徑竄邑境縣長楊君紹曾曉暢軍事聞耗即召地方士
紳組織防共委員會二十日黎明匪至千餘由東南薄城
進襲相持半日不得逞退去既而匪大部麇至數逾萬人
向東南猛攻列梯競上皆被擊潰是時匪首賀龍自施鄢
村移駐近部之大羅城督攻蕭克更率黨力戰城東南勢
甚岌岌兵民勇健者悉趨於此以拒之不圖賀匪乘間率
悍黨數千繞撲西城砲火犀利適我軍彈罄匪乃由西城
畢登民兵猶巷戰不已前仆後繼血肉橫飛死傷枕藉嗚
呼烈矣匪入城遂大肆劫掠屠殺無辜越三日聞省軍至

始向鶴慶麗江一帶竄去是役也計擊斃匪偽師長參謀
長團營長各一人匪黨三百有奇負傷逸而道斃者亦數
百人聞匪黨語人曰自湘黔竄滇以來凡市縣抗禦者從
無賓川之強受創傷亡者亦無此次之衆云吾邑殉難者
為參議會議長趙君現清公安局長吳君紹伯却常備中
隊長馬君福恩分隊長李君錦標陳君進顯財政局職員
王君紹明等官紳兵民一百七十八人斯役受禍之劇不
減於前清咸豐丙辰之亂也嗚呼慘矣事平由各親屬自
行殮葬者五人由官紳收集者百二十三人合葬於城南

門外並呈准建坊一體入祀忠烈祠以慰幽魂禮也八月
墓工竣竊石立碑囑炎為記吾思各官紳民兵不幸以敵
衆我寡而罹此大禍卒能赴義若渴視死如歸存正氣於
天壤間豈特遐邇人士聞而欽歎即後之過斯墓者必肅
然起敬與黃花崗烈士墓同深悲吊也嗚呼足不朽矣

民國二十五年李培炎撰

賓川抗禦共匪殉難官紳兵民墓表

民國二十五年三月共酋蕭克賀龍率黨數萬衆自黔狂
竄入滇臨尋甸富民等縣至普渡河我滇軍扼其入川之

路於是乘間挺走承突而西撲羅次躡楚雄二十有八日
竄抵賓川縣長楊君魯登地方士紳率民兵血戰竟日
力竭城陷死事之烈為共匪所經各縣冠事後閣縣公議
呈准大府以殉難諸君入祀忠烈祠收殮遺骸合瘞於城
南伏鳳崗而走書徵文於余以表墓道猶楚人之亂禮國
殤也謹撫各方紀載及鄉人與於是役者所口述濡之筆
貞之珉當共匪西竄警耗至賓縣長集士紳協議設防共
委員會以資統籌賓川舊有常備兵壹百陸拾餘名事前
復奉檄抽調六十五名赴大理餘者為數僅百不敷配置

方征調五區民兵千五百人共策防守以器不足雜以戈
矛以在籍士紳張君紹康等分任指揮事宜增壘雉堞并
堵塞各門出入附郭四周環植鹿角棘刺官紳兵民慷慨
登陴是以城共存亡何其壯也部署既定而賀匪部衆麇
集猛攻東南兩門自卯及午屢進屢仆迄未得逞未申間
蕭匪續至四面合圍附郭郊野雲發颿舉彌望皆賊數逾
萬衆蟄附環攻屢挾雲梯薄城我軍竟以長矛攢刺殪而
顛之奪梯入城苦爭至薄暮時城北碉堡坐不兼顧為賊
據賊遂以機關槍手溜彈瞰射城西彈密如雨鐵飛石裂